

感症鑑筏

增春署簽



感症寶筏卷之三目錄

傷寒變症

衄血

吐血

蓄血

熱入血室

痞

痞滿

結胸

下利

小便附

癰疹

附痞

發黃

瘧

發狂

煩躁

停飲

心下悸

嘔吐

吐衄

噫噎

呃逆

喘

奔豚

動氣

戰振慄

筋惕肉瞤

循衣摸床

不食

不便

不便能食

百合狐惑陽毒陰毒



感症寶筏卷之三

傷寒變症

傷寒有本病。有變病。本病者。如太陽有頭痛項強。陽明有潮熱譫語。是也。治法不外本經。故即附于本經之下。變病者。本不應有此病。祇因治不中的。或遷延日久。而變生諸症。如蓄血結胸等症。是也。治法不得不隨症用藥。因病施治。用列於左。以盡傷寒之變。

衄血新法

衄血者。血從鼻中來也。傷寒衄血。其因有三。太陽失表熱。瘀于經而衄者。熱傷陽絡則衄。有頭疼目暝之徵。太陽衄血見症。宜清解之。羚羊角、黑梔子、連翹、赤芍、丹皮、元參、薄荷、黑荆芥、鮮生地、牛膝、澤

瀉。茅根之屬。降之。清之。不可再汗也。陽明失下。熱瘀于裡。而衄者。有
漱水。不欲嚥之徵。陽明衄血見症。宜下解之。生地、赤芍、丹皮、牛膝、
查肉、桃仁、大黃之屬。下之。清之。此釜底抽薪。大黃不妨重用也。大
黃宜醋炒。更有溫熱之症。藥宜涼解。誤用辛溫。而動經血。亦能致
衄。陽盛則衄。以上即衄之三因。宜清血分。犀角、連翹、赤芍、丹皮、元
參、生地、牛膝、茜根、茅根之屬。清之。解之。如衄後身涼。脈靜。邪從紅汗
而解也。邪從衄解。若衄後病勢反劇者。更傷其陰也。大爲危候。其
衄勢必重。須大劑六味。飲加麥冬、五味以滋之。衄後病劇。陰傷而
邪欲內入也。急宜救陰爲主。衄止則生。更有衄勢太甚。陽隨陰走。
四肢厥冷者。六味加牛膝、肉桂以鎮之。虛陽隨陰火而上越。急當

救陰引火下行。仲景論云。若頭痛者。必衄。宜桂枝湯。此桂枝湯補。在上文當須發汗下。又云。劇者。必衄。衄乃解。麻黃湯主之。此麻黃湯補。在上文當發其汗下。乃古人倒筆法。是申明致衄之由於失表。非謂衄後服麻黃桂枝也。觀下文衄家不可發汗之戒。義可知矣。此二條言不發汗因致衄。非衄後再可發汗也。

吐血新法

傷寒吐血。每因失治所致。有因太陽感寒。無汗惡寒。頭痛發熱。寒邪外束。法當發汗。若失於表散。陽氣不得外洩。則逆走陽絡。絡血妄行。則致吐血。寒鬱於表。邪不外出。則蒸化爲熱。熱傷營絡。絡血上溢。而爲吐血也。或有人素有血症。寒邪犯肺而咳。震傷血絡。亦致

咳血（其人絡氣本傷邪入肺而咳傷肺絡亦見吐血）均當以清疏營衛表散寒邪爲治。古人皆以麻黃桂枝等湯治血症是也。然未免太峻。當小其製。用蘇葉、荊芥、薄荷等以去風散寒。橘紅、杏仁以降氣。芍藥、甘草以安營。微兼渴者少佐黃芩以清熱。則營衛之邪解散自然嗽止身涼血不治自止矣。

邵評此二方是風寒初起邪在於表用爲表散之劑至見吐血衄血其邪已化熱入裡豈有再用辛溫表散之理麻桂二方斷非治血之方古人所言風寒在表之時不用麻桂發表以致邪鬱成熱熱入傷營分而吐血衄血非見血之後再用麻桂止血也學者切勿以麻桂二湯治血症致誤大事此方實

治寒邪不從表達鬱而成熱熱入於裡營絡傷而吐血之正法。

若內有伏火外感寒邪熱被寒束火逼絡血而致衄血咳血者寒束於外火遏於內營被火灼而絡傷血隨火而上溢出於口鼻也。外症亦惡寒發熱但兼口渴舌乾爲異（火熱內遏之症）治宜辛涼清解營衛（辛涼清解乃是正法）須用桂枝、羚羊、石羔、黑梔、豆豉、丹皮、黃芩、桑杏之屬散之清之。次用和血清絡之品調之。

邵評此與上條合是傷寒而成吐血上條寒邪在表失於表散寒鬱化熱入裡傷絡而吐血此條內有伏火寒束於外火逼傷絡而吐血學者最宜甄別。

有因風寒之邪誤汗動血有因三陽熱盛沸騰經血皆致吐衄（風溫症不可用辛溫發汗誤汗則陽邪亢盛熱入於營血絡受傷而吐衄也）凡見眼閉目紅神昏語亂煩躁漱水（風寒火熱見症）皆熱傷血絡之症也宜犀角生地丹皮山查鬱金銀花赤芍連翹川連之屬（清營解熱之法）以清絡中之瘀熱大便秘者（陽明熱結）加醋製大黃尤妙

邵評此風溫症誤用辛溫發汗熱盛傷營而吐衄之正法與前二條傷寒吐衄不同

若兼胸滿而痛者（熱邪挾血瘀阻絡中氣滯作痛）血瘀于絡也當攻去之犀角生地歸尾杏仁赤芍查肉青皮降香大黃之屬行之清

之。

邵評此治瘀血阻於絡中之正法。

有誤發少陰之汗動其經血從口鼻耳目中出者名下竭上厥不治。
(誤發少陰汗血隨上升從清竅而出乃陰下竭陽上厥也)
有暴吐臭腐之血名內潰(藏府受傷而內潰也)不治。

蓄血述古

凡太陽病不解其邪由經入腑熱結膀胱則血凝蓄血瘀則心氣結故其人如狂血自下者愈邪從血下而解也其外不解者當先解其外宜桂枝湯外已解但小腹急痛者是蓄血也桃仁承氣湯下之邵評太陽邪熱不從表出隨經入府府者膀胱也府有餘熱則



經中之血與熱相搏。蓄於下焦。名曰蓄血。熱邪上薰於心。故其人如狂。若血不結而下出。則熱隨血下而愈。如不愈而少腹急結者。必用攻法而去之。欲用攻法。須先審其外症。如外不解而攻之。血雖去而外邪復入于裏也。故必先解外邪。外邪已而但少腹急痛者。是蓄血也。用桃仁承氣湯。以下血散熱。乃先表後裏之治法也。然此治蓄血之輕症。

太陽病六七日。表症仍在。脈微而沉者。病邪向裏也。反不結胸者。熱結下焦也。其人發狂少腹硬滿。小便自利者。此條着眼小便自利一症。以太陽隨經瘀血而蓄於裏也。抵當湯下之則愈。

邵評。太陽六七日。表症仍在。而脈微沉。是經邪陷入太陽之府。

也。反不結胸而發狂。其邪不在上。而熱瘀下焦血分也。夫蓄血而致發狂。熱勢攻心。非用單刀直入之將。必不能斬關取勝。是舍抵當逐血一法。更有何藥。破其堅壘哉。然此蓄血之重症。故用抵當湯直攻其血。而不顧表症。與上條先表後裏不同。蓋同一蓄血。桃仁承氣治瘀血將結之時。抵當治瘀血已結之後。

又評此條經文表症仍在下。當有而反下之句。誤下熱邪。自經入府。結於膀胱而下焦蓄血。不成血結胸病。則知覺昏昧。故發狂。此經病傳府表病傳裏氣病傳血。上焦病而傳下焦也。少腹居下焦。爲膀胱之室。瘀血留結。故硬滿。小便自利者。病

不在氣而在血也。下其血而氣自舒。攻其裏而表自解矣。
太陽病身黃（濕熱相搏）脈沉結少腹硬（濕熱蓄下焦）小便不利
者爲無血也（小便不利水結也小便自利蓄血也）此濕熱不行之
故小便自利其人如狂者血症諦也。

邵評身黃脈沉結少腹硬水病血病皆有之小便不利知水與
熱結爲無血而有水五苓散症也若小便自利其人如狂乃
熱與血蓄於下焦爲有血而無水抵當湯症也故太陽熱入
膀胱有水結血結之分也。

陽明病其人喜忘者必有蓄血蓋心主血血凝則心氣結而失其官
矣故喜忘此素有瘀血非傷寒所得者屎雖硬大便反易（此條以

大便反易作眼。其色必黑。以浮血隨便而下故也。俱宜抵當湯下之。

邵評。此借發黃。小便不利。以辨蓄血之小便。自利。瘀血是病根。喜忘。是病情。此陽明未病前症。夫心爲血之主。瘀血與熱蓄積既久。上干於心。故令喜忘。屎硬者。大便當難。今大便反易。而黑色。是宿血瘀蓄之故。以此大便反易之機。因究其色之黑。乃得其病之根。因知前此喜忘之病情耳。當用抵當湯入血。破結之劑。下其瘀血。血去熱亦不留矣。

傷寒有熱。少腹滿。應小便不利。今反利者。爲有血也。當下之。不可用峻藥。宜抵當丸緩下其血。

邵評有熱身熱而表症仍在也。少腹滿熱入下焦也。但滿而不硬。其人未發狂。何以知其有血。但熱入下焦而少腹滿。應小便不利。今小便利。豫知其有蓄血也。蓋少腹之滿比硬稍輕。當小其制。故用丸以緩之。以上述仲景論兼參來蘇集類方註釋之。

又評此豫辨蓄血。亦以小便之利與不利驗之。上條以大便易而黑。定其爲蓄血。此條以小便反利。辨其爲蓄血。審症之精。極當細玩。

蓄血一症。雖病在血分。亦須分別陰陽治之。如血瘀上焦爲陽。血蓄下焦爲陰。太陽失表熱。瘀于裏。蓄血上焦爲陽。太陽誤下。陽氣下陷。

蓄血下焦爲陰。

邵評蓄血有陰陽之分。在上焦者爲陽。在下焦者爲陰。上焦由太陽失表。熱與血瘀。下焦由太陽誤下。陽氣下陷。

上焦蓄血。因不得汗。不能發斑而蓄血也。邪不從表外達。抑遏入內。傷營血而蓄于上焦。是陽熱之症也。其脈人迎必緊。緊者數而有力之象也。陽熱之脈。外症面紅舌燥。熱象發躁欲狂。或頭搖目瞪。大便下血。水兩手除食指之外。其餘各指皆抽掣是也。宜犀角桃仁生地赤芍歸尾丹皮丹參鬱金之類。清之行之。

邵評血蓄上焦。有陽症而無陰症。治以清熱破血之法。蓄血下焦。有陰症陽症之不同。非比上焦蓄血。有陽症而無陰症也。

下焦陽症。由邪熱內入下焦。熱邪與瘀血蓄結膀胱。用攻血

攻下治之。

下焦陽症蓄血。即仲景所稱熱結膀胱之症。桃仁大黃之屬下之是也。若下焦陰症蓄血。乃因誤下。陽氣下陷。陰血受傷。血因寒而凝也。其見症面白目青。虛寒之症。眉皺目瞪。寒戰口噤。寒症見象。舌胎白滑。虛寒舌胎。大便下血水。兩手除食指之外。其餘各指皆抽掣是也。宜溫補之。如人參附子白朮當歸肉桂桃仁升麻炙草之類。溫補中陽和營散寒之劑。溫補以升陽氣。如服藥後寒噤稍止。陽氣流通故噤止。一二時復作者。藥輕病重。此藥力不及。再進之。以續陽氣。寒噤得止者生。陽回則生。陽絕則死。不已則

死。（參傷寒第一書）凡蓄血症大便下血水見糞者生不見者死（下血水見糞則中樞有權故生無糞則中土幾絕故死）

邵評下焦陰症蓄血由於誤下正氣受傷陽虛氣陷陰血凝蓄此陰寒症也與陽邪內結而蓄血者大爲不同醫者極當留心。

熱入血室附

婦人傷寒當經水適來適斷之時熱邪乘虛而入血室其症晝日明了夜則譫語如見鬼狀（晝輕暮重蓋衛氣盡則行陽二十五度周流二十八脈不與邪爭故輕夜則行陰二十五度周流五臟與邪相爭故譫語見鬼）若發熱惡寒日輕夜重小腹脹滿者血爲熱瘀也。